

Na osnovu člana 16. stav 1. Zakona o Vladi Zeničko-dobojskog kantona - Prečišćeni tekst ("Službene novine Zeničko-dobojskog kantona", broj: 7/10) i člana 27. Zakona o dopunskim pravima branilaca i članova njihovih porodica („Službene novine Zeničko-dobojskog kantona“, broj: 1/14), na prijedlog Ministarstva za boračka pitanja, Vlada Zeničko-dobojskog kantona, na 129. sjednici, održanoj dana 18.01.2018.godine, d o n o s i

## **U R E D B U**

### **O IZMJENAMA I DOPUNI UREDBE O POMOĆI U RJEŠAVANJU STAMBENOG PITANJA BRANILACA I ČLANOVA NJIHOVIH PORODICA**

#### **Član 1.**

##### **(Izmjena člana 4. - Posebni uvjeti)**

U članu 4. stav (1) Uredbe o pomoći u rješavanju stambenog pitanja branilaca i članova njihovih porodica („Službene novine Zeničko-dobojskog kantona“, broj: 4/14), (u daljnjem tekstu: Uredba), u tački g) riječi „pravno ili fizičko lice“ zamjenjuju se riječima: „privredno društvo“.

#### **Član 2.**

##### **(Izmjene i dopuna člana 12. – Potrebna dokumentacija)**

- (1) U članu 12. Uredbe, u tački l) na kraju teksta riječ „i“ zamjenjuje se tačkom zarezom, a iza tačke l) dodaju se nove tačke m) i n) koje glase:
- „m) ovjerenu kopiju Specifikacije za utvrđivanje dohotka od samostalne djelatnosti - obrazac SPR 1053 (koji se podnosi uz Godišnju poreznu prijavu/Godišnju prijavu dohotka) za prethodnu kalendarsku godinu;
  - n) ovjerenu izjavu o ukupnim prihodima domaćinstva;“.
- (2) Dosadašnja tačka m) postaje tačka o).

#### **Član 3.**

##### **(Stupanje na snagu i objavljivanje Uredbe)**

Uredba stupa na snagu danom donošenja, a ista će biti objavljena u „Službenim novinama Zeničko-dobojskog kantona“.

**PREMIJER**

Broj: 02-02-989/18

Datum, 18.01.2018. godine

Z e n i c a

*Miralem Galijašević*

DOSTAVLJENO:

1x Ministarstvo za boračka pitanja,

1x „Službene novine Zeničko-dobojskog kantona“,

1x a/a.

## **O B R A Z L O Ž E N J E**

### **I. Zakonski osnov za donošenje Uredbe**

Zakonski osnov za donošenje Uredbe o izmjenama i dopuni Uredbe o pomoći u rješavanju stambenog pitanja branilaca i članova njihovih porodica sadržan je u članu 16. stav 1. Zakona o Vladi Zeničko-dobojskog kantona, te članu 27. Zakona o dopunskim pravima branilaca i članova njihovih porodica.

### **II. Razlozi za donošenje Uredbe i obrazloženje pojedinih rješenja**

Uredba o pomoći u rješavanju stambenog pitanja branilaca i članova njihovih porodica donesena je na osnovu člana 27. Zakona o dopunskim pravima branilaca i članova njihovih porodica ("Službene novine ZDK" broj 1/14). Uredbu je donijela Vlada Zeničko-dobojskog kantona a objavljena je u "Službenim novinama ZDK" broj 4/14.

Intencija odredbe člana 4. stav (1) tačka g) Uredbe je bila omogućiti apliciranje za dodjelu sredstava pomoći u stambenom zbrinjavanju braniocima i članovima njihovih porodica skromnijeg imovinskog stanja. U cilju zapošljavanja branilaca i članova njihovih porodica koji su na evidenciji Službe za zapošljavanje Kantona, Ministarstvo za boračka pitanja planira, izdvaja i dodjeljuje posebna novčana sredstva u skladu sa Uredbom o dodjeli kredita za zapošljavanje branilaca i članova njihovih porodica, te već treću godinu zaredom - na osnovu Programa podsticaja samozapošljavanja pripadnika branilačke populacije Zeničko-dobojskog kantona, kojeg na prijedlog Ministarstva donosi Vlada Kantona po usvajanju Programa utroška sredstava Ministarstva za tekuću budžetsku godinu. Po osnovu dodijeljenih sredstava u ovu svrhu izvršeno je zapošljavanje odnosno skidanje s evidencije nezaposlenih lica većeg broja branilaca i članova njihovih porodica, i time omogućena pomoć u rješavanju egzistencijalnih pitanja njihovih porodica. Imajući u vidu da odredbe člana 4. sadašnjeg teksta Uredbe praktički onemogućavaju da se braniocima i članovima njihovih porodica čiji je član porodičnog domaćinstva korisnik naprijed naznačenih sredstava dodijele sredstva pomoći u stambenom zbrinjavanju, Ministarstvo je u obavljenoj konsultaciji sa kantonalnim branilačkim udruženjima odnosno po pribavljanju njihovog pozitivnog stava u tom smislu, odlučilo predložiti izmjenu Uredbe kojima bi se omogućila dodjela pomoći i ovim pripadnicima branilačke populacije.

Član 1. Uredbe predviđa izmjenu člana 4. osnovne Uredbe tako što se ograničenje za apliciranje za pomoć za stambeno zbrinjavanje ubuduće odnosi samo na vlasništvo/suvlasništvo registrovanog privrednog društva. Član 2. predviđa izmjenu i dopunu člana 12. osnovne Uredbe jer se pored dosadašnje dokumentacije od kandidata za dodjelu sredstava zahtijeva i dostava obrasca SPR 1053 koji se podnosi Poreznoj upravi uz obrasce 1051 i/ili 1052. Također se zahtijeva i ovjerena izjava o ukupnim prihodima domaćinstva, a koji često znatno premašuju podatke o plaći i drugim prihodima traženim dosadašnjom dokumentacijom. Intencija ovog člana je uvid u realno imovinsko stanje kandidata a u cilju dodjele pomoći kandidatima sa većim stepenom potrebe u tom smislu.

Sa tekstom Uredbe upoznata su kantonalna branilačka udruženja, koja su na zajedničkom sastanku u kabinetu ministra Ministarstva održanom 28.12.2017.g. jednoglasno podržala predložene izmjene.

Izrada teksta Uredbe je izvršena u skladu sa Jedinstvenim pravilima za izradu pravnih propisa u Zeničko-dobojskom kantonu ("Sl.novine ZDK" broj 5/08). Na tekst Uredbe zatraženo je mišljenje Sekretarijata za zakonodavstvo, Ministarstva finansija i Ministarstva za pravosuđe i upravu, koji u svojim odgovorima nisu istakli primjedbe na isti.

### **III. Finansijska sredstva potrebna za provedbu Uredbe**

Finansijska sredstva za provedbu Uredbe osiguravaju se svake godine u Budžetu Kantona na budžetskoj stavci Ministarstva za boračka pitanja, razdjel 24, budžetska organizacija 01, potrošačka jedinica 0001, ekonomski kod 614200, subanalitika OAD 208 "Pomoć u rješavanju stambenog pitanja". Za provođenje ove Uredbe nije potrebno osiguravanje dodatnih budžetskih sredstava, s obzirom da se sredstva dodjeljuju na osnovu liste prvenstva do visine opredijeljenih budžetskih sredstva u ovu svrhu.

**MINISTAR**  
*Fahrudin Čolaković*